

Святого славного пророка Илии.

На велицей вечерни.

Поем Блажен муж, 1-й антифон

На Господи воззвах,

стихиры на 8. Глас 1-й. Подобен: Небесных чинов:

1. Стих: Из глубины воззвах к Тебе, Господи,/ Господи, услыши глас мой.

2. Стих: Да будут уши Твои/ внимлюще гласу моления моего.

Иже Фесвитянина Илию колесницею о́гненною/ от земли Щедре преложивый, Сло́ве:/ сего молитвами спаси нас верно Тя славящих,/ и того творящих радостно// божественную память и светонóсную. **Дважды.**

3. Стих: Аще беззакония назриши, Господи, Господи, кто постоит;/ яко у Тебе очищение есть.

4. Стих: Имене ради Твоего потерпех Тя, Господи, потерпе душа моя в слово Твое,/ упова душа моя на Господа.

В трусе и вихре тонце,/ видел еси Божие пришествие,/ Илие богоблаженне,/ просвещающее тя древле:/ на колеснице же сидя четвероконней,/ небо прееждал еси страннолепно,// удивляемь богодухновенне. **Дважды.**

5. Стих: От стражи утренния до нощи, от стражи утренния,/ да уповает Израиль на Господа.

Иереи студныя ножем заклáл еси́,/ небо языком на зéмлю/ не дождити удержáл еси,/ ревностию Божественною разжéгся:/ Елиссеа же исполнил еси мило́сти/ поданием сугубым, му́дре Илиé,/ Божественныя благода́ти.

Ины стихиры, самогласны. Глас 2. [Иоанна архиепископа:]

6. Стих: Яко у Господа милость и многое у Него избавление:/ и Той избавит Израиля от всех беззаконий его.

Светильники возсияша вселенней два, всесветлый Илия и Елиссея: ов убо Божественным словом небесныя капли затвори, и царя обличи, на колеснице же огненной на небеса вознесся, ов же безчадныя воды исцели и сугубу благодать прият, Иорданския струи раздели. И ныне со ангелы ликующе, о нас молят, спастися душам нашим.

7. Стих: Хвалите господа вси языцы,/ похвалите его вси людие.

Яже на воздусе колесница тя подъемши огненосна, яко в трусе на Небеса, огнедохновенную благодать тебе чудес подаде, Илие Фесвитянине, нетленна тя сотворши, еже не видети смерти, дондеже убо проповеси всяческим кончину. Темже прииди, подавая нам твоих исправлений наказание.

8. Стих: Яко утвердися милость Его на нас,/ и истина Господня пребывает во век.

Светильниче невечерний церквей Божественною ревностию разжигаемь, Илие пророче, небесныя капли затворил еси: и враном питан быв, царя обличил еси, и священники уморил еси: огонь с небесе свел еси: и пятьдесятника два уморив, наплатил еси вдовицу елеем и муки малою горстию: и сына ея молитвою воскресил еси. Огонь разжегл еси в воде: Иорданския струи пеш прешел еси: колесницею же огненною на небеса вознеслся еси, Елиссею благодать сугубую подал еси. Молися непрестанно Богу, спаситися душам нашим.

Слава, глас 6: [Византиево:]

Приидите православных совокупление,/ сошедшися днесь в пречестнем храме богоглаголивых пророк,/ псаломски воспоем сличную песнь,/ сих прославльшему Христу Богу нашему,/ и веселием и радостию возопием:/ радуйся, земный ангеле и небесный человеце,/ Илие великоимените./ Радуйся, иже сугубую благодать от Бога приемый,/ Елиссее всечестне./ Радуйтесь, заступницы теплии,/ и предстатели и врачеве душ и телес христоролюбивых людей:/ от всякаго прилога сопротивна и обстояния,/ и всяких бед избавите верно совершающия// всепразднственную память вашу.

И ныне глас тойже :

Кто Тебе не ублажит, Пресвятая Дево;/ Кто ли не воспоет Твоего Пречистаго Рождества;/ безлетно бо от Отца возсиявый Сын Единородный/ Тойже от Тебе, Чистыя, пройде,/ неизреченно воплощся/ естеством Бог сый,/ и естеством быв Человек нас ради/ не во двою лицу разделяемый/ но во двою естеству неслитно познаваемый/ Того моли, Чистая Всеблаженная,// помилуй души наши.

Вход. Прокимен дне и чтения три.